

si la Signoria manderà galie, a muda di octubrio over novembrio, darà materia a' forestieri non farà quello fanno. *Item*, li im porto sono barze 3 francese, hanno da colli 350 specie, tra le qual zenzeri colli 80. *Item*, in dito porto è nave X dil soldan, do di botte 700, le altre di 200 fin 300 l' una; sonp a carena, e si lavora per mandarle in colfo di la Jaza, per cargar di legnami, per far navilij per Mar Rosso contra portogalesi. *Item*, al Cajaro, a di 20 april, si levono 5000 mamaluchi contra il soldan, per certo don solea darli, quando nasceva fiol dil soldan; et perchè, za anni do, è stà scoperto esser nassudo uno fiol al soldan, qual l' ha tenuto occulto anni 4, dimandano la usanza l'oro; et erano menati in tempo, *unde* si sulevono, messe a remor, e molti bazari a sacho. E per ofender il soldan, volea levar Dulti bei; el qual andò al soldan in castello, facendo scusa nulla sapea. Diti zilebi forno roti, e alcuni fe' tajar per mezo, altri fece anegar; e per tal vitoria il paese fe' festa. *Item*, el tardar di le galie, poi compito muda, è stà per uno garbujo fato. Par, che un Rado de Lustiza vendesse a l' ammirajo curaze per ducati 222, e ave capara; el qual montò su uno bregantin e andò in Candia. *Item*, scrive di le galie nostre bastarde venute li; e prese una nave da Liesna, patron Matio di Polo, carga di ogij, di raxon di catelani e francesi, e la prese a Bichieri; *unde* l' ammirajo volse la restituise. *Item*, è stà trato per ducati 245 milia; tocha 2 $\frac{1}{4}$ per 100 a la merchadantia. *Item*, di le nove de India, è za molti zorni che nulla si havea; *solum* a di 24 dil presente mexe vene letere dil Ziden a questi merchadanti mori. *Etiam* fo letere di Colocut, come le caravele over navilij di più sorte de' portogalesi, numero 22, apresentati a Colocut, in tempo che 'l signor di quel luogo era fuora di la terra, dove messeno a sacho e brusono parte del loco. Inteso questo, el signor mandò sue zente e li rebatè, e parte si butò a l' aqua; *unde*, tra morti et anegadi, dicono esser numero 500, tra i qual i primi di l' armada. I qualli, auto tal rota, mandono uno salvo conduto in terra per acordo, e li oferseno 400 milia ducati, ch' è cosa absurda, con condition non lassi praticar più in quelle parte, nè darli recepto; non volseno acceptar el partido, e loro ritornò a Cananor. Quel signor di Colocut à mandato orator al soldan, insieme con altri signori de l' India, a dar noticia dil seguito, e vol lo ajuto promesso; e se fin uno anno non li sarà mandado, torano partido, perchè molti signori de l' India sono in favor di portogalesi. *Item*, scrive esso consolo, come, per quel consejo di li, è stà fato revedador di libri e conti di pro-

vedadori sora cotimo sier Marin da Molin, fo consolo de li, el qual accettò e zurò. *Item*, hanno electi provedadori sora il cotimo sier Domenego Capello, *quondam* sier Nicolò, sier Matio Vituri, *quondam* sier Bortolo, e sier Marin Contarini, *quondam* sier Bortolo.

Copia de una letera di l' ammirajo di Alexandria a la Signoria nostra.

In la presentia di honestissimi et honorandissimi, honestissimi, potentissimi, fortissimi signori, mantegnenti la sua generatiom et gloria de la sua gente, el qual è molto providente de la sua gente, mantegnente de suo' cavalieri, beleza de ogni comperazion del parlar de la justitia christiana, beatissimo de i fioli batizadi de tuti sequente sua obedientia, adorante la † intra el populo christiano, Dio mantegna la persona sua, amico di signori et de' soldani, doxe di Veniexia.

In nomine Domini.

La causa de questa letera a la presentia, honestissimi, honorandissimi et intelligentissimi, potentissimi signori, honorandissimo liom gajardo, over de la gente sua, gloria del populo, beleza de ogni comperation, mantegnente de' cavalieri, signor de' christiani, parente de le sedie et parlar de la justicia christiana intra la gente christiana, doxe di Veniexia, Dio lo mantegna la sua persona.

Da poi zonte le galie grosse in Alexandria, hanno fato la vendeda et la comprada, secondo la consuetudine usada. E da poi finito la fiera, vene l'onestissimo capitano di le galie sutile, con galie tre, et andò di longo, fuora de lo porto de Alexandria, fina al porto di Bichieri, et discoverse una nave francese, la qual vegniva in Alexandria, con merchadantie; et venuto fuora el capitano dil porto di Bichieri, con galie 3, et prese la nave francese. Et quando nui havemo inteso quello, mandasemo a far asaver al capitano, che la reputaziom del porto del signor soldan non se die' prender in quello porto nave; et arivò uno comandamento dil signor soldan, Dio lo mantegna, reprendendo, per causa de quello, che debba tornar la nave indriedo; la qual nave el capitano mandò in Alexandria a suo' patroni, di cui la giera. Et questo femo asaver a le signorie vostre honorandissime; e quello li farà de bisogno al capitano, over neccessità, che lui ne faza asaver, che 'l sarà fato tutto per suo amor volentiera.

In Alexandria, a di etc.